

## **Yudhà andí bhàruwà Yàrí bhàruwà ò ì nòtù ádròdrò dhu tí dhu**

Yàrí ídò bhàruwà nandí ní «Yudhà, Yàkòbhò t'ádònà» tí kátina ale (1). Ndi Yudhà mà adònà Yàkòbhò mà nà òyòrò kóró ní'ì Yèsù t'ádóná-nzo (Màt 13.55). Kándí ndi pbìndà bhàruwà mbèmbè azà kumì atò údà Yèsù Krístò ka kùgù dhu-dzidò rórò.

Ndi andítá rí dhu ìtè Yudhà rambénà dhu òvò dǒ atdí kànísà tò, ndirò ngàtsi ní íbí kànísà tò. Pbétù, ka kùni nzá atdí kànísà mà abádhí nzínzi ò náarí'ì ònà kígò. Pbìndà bhàruwà ò, kítsu átò Ungbòta-Ayí ò bhùkù mà Pbàyàhúdí tó ngùkpà andítá mà nà ò arí'ì irèta. Ní ka kùrè dhu ní kándí dhu fíyò ábhò ale rí'ì pbàkrístò tí rí'ì Pbàyàhúdí.

Yudhà í'ì nà irèta ní pbàkrístò tò ndì ndí dhu àndí Yèsù arí indrù ìgù dhu dǒ ní irèta (3). Pbétù, kála dhu ní dhu ràkă nditdyu abádhí-nyìkpó tsakàtsakà nyú abádhí nzínzi ò ì nítsu pbàkrístò tí arí 'àti ale rǒ rò (4). Í ale owúnà 'àti rǒ pbàkrístò tí, pbétù ìnzí 'àdù Kàgàwà nyú ná'ù. Ndirò abádhí ní'ì múnnyònitále.

### **Bhàruwà-nyìtì ka kóhù tí dhu**

- Bhàruwà-dòkpa (1-2).
- Yudhà rí pbàkrístò àvì rùgyè ì, 'òdò yà atdí-gùna tí Kàgàwà íbhò pbìndà dhu tí arí'ì ale tò a'uta mběyi (3-4).

- Yudhà rĭ Ádr̀ngbǎle Kàgàwà itd̀iya atd̀idĭ pb̀akr̀ist̀ò tí arí 'àti ale, pb̀ét̀ù imbǎ 'àd̀ù ì'ì pb̀akr̀ist̀ò tí ale-ànyǎ tí dhu t́o atd̀idhená ófò nít̀e dhu (5-19).
- Yudhà rĭ pb̀akr̀ist̀ò ònzi ròẁù angyi tí fĭyó a'uta ǒ, ndir̀ò ròngò ídzìnga ònzì yà afiya arúguru Yèsù ì á'ù dhu dĭ ale t̀ò dhu (20-23).
- Yudhà rĭ Kàgàwà ìfũ pb̀ìndà ádr̀ngbǎnga t́o obi-okú dò rò dhu. Ndi obi nĭ, Kàgàwà arí pb̀ìndà ale-ngb̀ò òd̀o ndíńì oko tí r̀óná ì ápbǎ ì rór̀ò tí (24-25).

### *Yudhà rĭ pb̀akr̀ist̀ò nóvì dhu*

<sup>1</sup> Ima Yudhà, Yèsù Kr̀ist̀ò bhà ino-akpà, ndir̀ò Yàk̀obhò t'ádònà, ma màndì dhu fũk̀ù yà Àba Kàgàwà únzi nyĭ, k̀òzè nyĭ, ndàd̀ù àmbè nyòd̀ò dĭ Yèsù Kr̀ist̀ò t̀ò rò. <sup>2</sup> Dhu àkǎ Kàgàwà bhà izu mà, Kà bhà màr̀ungà mà, Kà bhà àzè mànà rì'ì abho nyú fũk̀ù.

### *T̀it̀ò t́o màlímó (2PÉ 2.1-17)*

<sup>3</sup> Odhídũ, yà atd̀idĭ ma mózè nyĭ rò, ma múbhì dhu-atdyú òhò rĭ atd̀idĭ, ndíńì ma mandí tí dhu fũk̀ù yà atd̀ikpá àlĕ kí'ì nà nyĭ mànà òg̀ù-okú dò rò. Ní, ma mála dhu kà ràkǎ wà mandì, ndíńì nyĭ nyabá tí obi, nyámbe nyũgyè dĭ nĭ, nyòd̀ò yà atd̀i-g̀una tí Kàgàwà ìbhò pb̀ìndà dhu tí arí'ì ale t̀ò a'uta mběyi. <sup>4</sup> Obhó tí, atd̀idhená nzére ale nít̀sù wà nzínzìku ò inzá nyĭ nỳèni rór̀ò. I ale ní iwà Kàgàwà náatd̀ì ànyǎya angyangyi nyú ale. Abád̀hí úg̀èrè Kàgàwà bhà izu t́o ote rì'ì yà ì ózè

'ònzì nzéere dhu ònzi ì í òná otu tí. Ndirò, abádhí ódhò wà Yèsù Krístò, yà atdí tí arí'ì àlě tó Màlimò, ndirò àlě tó Ádrùngbǎle. <sup>5</sup> Ìmbǎ dhu ì'ì iwà nyí nyúni yà ma móvona fúkù dhu angyangyi dhu màtí, ní ma mòzè misè fúkù dhu ní, Ádrùngbǎle Kàgàwà nígú p̀b̀indà ale Mísri tó p̀b̀iri ǒ rò dhu. Tdítdǒ, kǎdù abádhí nzínzi ǒ ì nùvò, ìnzí 'à'ù ndì ale-tse nábhù ròtdì ndì. <sup>6</sup> Ndirò, nyí nyàkǎ nyìrè atdídhená màlàyíká náanzì dhu: abádhí náadò nzá fiyó ádrùngbǎnga, p̀b̀étù abádhí núubhà yà ì aróko òná ngari nyú. Ní Kàgàwà arí abádhí òdo ínò ǒ ùsò ndì ndúsò dhòdhódhóngà tó imbi ò rórò, róngò àmbe ìndrù-ànyǎ ìtdì ndì ndaraya òná ádrùngbǎ idhò nódò dǒ. <sup>7</sup> Ndirò, dhu àkǎ nyìrè átò ní Sòdomò mà Gòmòrà mànà tó kigò, tiyá arí'ì kyèròkyèrò kigò mànà. Ì kigò ǒ bhà náanzì nzérenga ndi dhu bhěyi tí. Abádhí níipfo ì m̀nỳòǹì tò, 'àdù àmbe ìnzí ìndrù nyú àmbènà ònzina nzérenga-tidò ònè dǒ 'ònzì. Ní, ndi dhu-okú dò rò, Kàgàwà atdì wà abádhí-ànyǎ róngò àp̀b̀è àbà ìnzí aráve dhòdhódhóngà nà kàzù ò, ndíni ì'ì tí ìndrù-nyìkpó ìtdyù rádù atdí ófò tí.

<sup>8</sup> Ní ndi dhu bhěyi tí, kǒkò nzínzikù ǒ rí'ì nzéere ale náarí dhu ònzi ì kigò ǒ bhà nóongónà dhu ònzì dhu bhěyi tí: abádhí rìrèna nzéere dhu náarí abádhí àbhǔ rìti ngbǒya, 'àdù àmbe Kàgàwà bhà ádrùngbǎnga gàyà nónzi dǒ. Ndirò, abádhí arí dhu ùnò nzéere nyú òrù-akpà ò aróko ádrùngbǎnga tó awáwù ǒ màlàyíká nǐ. <sup>9</sup> P̀b̀étù, yà Músà-abvò dǒ ì í 'àtò, 'àmbe 'àgò dǒ P̀fòmvo nà rò, Mùkǎli, Kàgàwà bhà màlàyíká ǒ ádrùngbǎle, náamvù nzá ndòtdì anya kà-dǒ,

ndùnò dhu kà nǐ òná. Pbétù, kǎdù dhu òvò kà tò, ndàti: «Ádrùngbǎle Kàgàwà àkǎ ndàbhũ nyi nyabà àpbè.» <sup>10</sup> Pbétù, kǒkò ì nzéere ale náarí dhu ùnò inzà ì ùni dhu nǐ màtí. Ndirò ìzǎ, yà ìmbǎ arí'ì inga t'únita nà, ní bhà irèta tó ófò ǒ abádhí ùni dhu náarádù abádhí àbhũ rùwí ùwí tí. <sup>11</sup> Ní, abádhí rǐ'ì àpbè ǒ! Abádhí ótsù Kàyinà náatsù òná otu ǒ. Abádhí ùnò tìtò Balamà bhèyi fùrangà-okú dò rò. Ndirò, abádhí ùvè, Kòrà bhèyi ì ívǎ dhu dhu-okú dò rò. <sup>12</sup> Ndirò, abádhí mànà nyǐ nyóko, nyámbe dhu ònyà dǒ atdíkpá atdí odhi bhèyi dhu náarádù nyǐ ìtí ìtí tí. Obhó tí, abádhí arí dhu ònyũ 'ùlè nǐ abhò nyú ìnzǐ nyǐya rǐwũ rórò, 'adù àmbe ì kèlě níre dǒ ìtìrò. Abádhí ùli ì awe rǐrà nà àpbù, yà ìnzǐ rí igye àbhũ rìkǒ bhèyi. Ndirò abádhí ùli ì átò yà ìnzǐ arádù itsukpǒ ì'ò, yà ì àkǎnà 'ò'ò òná kàsùmì ǒ itsu bhèyi. Tdítdǒ, abádhí ùli ì yà ivéna ka kangbè, ràdù òtdyù dòtsí itsu bhèyi. <sup>13</sup> Abádhí ùli ì ádrùngbǎ rèrũ dǒ rí 'ùpbi obi nyú nà mùkurà bhèyi, ale nyǐ rǐwũ nǐ fíyó mùtsò ràdù 'ùli yà idha rǐdzìlǐna idha-gì dǒ mùselele bhèyi. Abádhí ùli ì átò, yà dhòdhódhóngà nà ì óngo òko òná atdí dǒ ùtì ìnò-íyà tó ngari Kàgàwà ópì fíyò akye rúbhi alali bhèyi.

<sup>14</sup> Ènokà náavò dhu angyangyi abádhí-okú dò rò. Ndi Ènokà ní'ì àrùbhù rí rùgànda ìsě Àdamù rǒ rò ndì nòpè rùgànda ǒ atdí ale. Ní kǎti: «Kànǐ Ádrùngbǎle Kàgàwà rǐrà pbìndà pbǎfe lufù-tsù ìlǐlǎ màlàyíkà nà. <sup>15</sup> Kà rǐrà ndínì ndì ndũnò tí yà adzi ǒ kóró ale-ànyǎ. Kà rǐ yà nzéere dhu ònzì arí kóró ale-ànyǎ ìtdì, ròná abádhí anzì kóró nzéere

dhu-okú dò rò. Kà rĩ i nzérenгатále-ànyă nítdì yà abádhí unction ndì nĩ ododu unction-abábá-okú dò rò.» <sup>16</sup> I ale-idhè náarí nż ndikă akekpa mătí, 'àdù àmbè ònu dŏ kóró kàsùmì ǒ. Ndirò abádhí arúbhi yà afiya nyú nózè itírò dhu bhèyi, 'àdù àmbè idzítá tó unction-abábá òtè dŏ. Ndirò, abádhí arífùna ale ní dhu àbà ì àdù foyá ale.

*Yèsù ná'ù ale tò ka kí sedzà àbhŭ dhu*  
(Kòl 2.6-7; 2Tè 3.3-5; Yàk 5.19-20; 2Pé 3.17-18)

<sup>17</sup> Nyí'ína odhídù, yà atdídŏ ma mózè nyí rò, nyí nyākă nyírè Ádrùngbăle Yèsù Krístò bhà uvitatále nũunction angyí fũkù unction. <sup>18</sup> Abádhí ati nyí nĩ: «Yà adzi ǒ dhu-tsù rĩ 'òdì òná kàsùmì rĩ 'ìndù rò, nyĩngò rí atdídhená ale ní'íya inè, 'àdù àmbè ùbhi dŏ afiya nyú ózè dhu bhèyi, itse nyú Kàgàwà rŏ rò.» <sup>19</sup> Abádhí ní ndì ìndrŭ-ǒnga àbhŭ arí rùndò ì ale. Abádhí arí yà adzi ǒ dhu kèlě nírè. Ndirò, Kàgàwà bhà ƒlĩlă-Alafí rĩ'ì mbă abádhí-nyutsi. <sup>20</sup> Pbétù nyí odhídù, yà atdídŏ ma mózè nyí rò, nyí nyākă nyŏsì nyí nzínzìkũ ǒ, wò nyí nyí'ì nà atdídŏ ìlă a'uta dŏ, nyădù nyĩtsò Kàgàwà bhà ƒlĩlă-Alafí bhà obi nĩ. <sup>21</sup> Dhu àkă nyŏkò Kàgàwà ózè nyí nĩ àzè ǒ, nyămbè àlě tó Ádrùngbăle Yèsù Krístò rĩbhona fũkù pbìndà idzìnga ǒ dhòdhòdhóngà tó ípìrǒnga nódò dŏ.

<sup>22</sup> Ndirò, nyí nyākă nyŏnzì kŏkò afiya arúguru Yèsù ì á'ù dhu dŏ atdídhená ale-izù. <sup>23</sup> Nyí nyākă nyĩgŭ ngũkpà ale, nyũdhă kàzũ ò rò. Nyí nyākă nyŏnzì idzìnga ngũkpà ale tò unction ònzi nyí nyí rórò, nyădù abádhí rŏnzina nzére dhu ábhũ ròtì mberù mà nódhò.

*Kàgàwà bhà ádrùngbǎnga ilè ka kí dhu*

<sup>24</sup> Kàgàwà ní nyǒdò rádù ìnzǐ nyǎwà nyǐ nzérenga ò, ndàdù nyǎbhu nyǐkò ìmbǎ nzére dhú na nyukutsì, ndirò ábhǒ dhèdhe nyé nà pbìndà ádrùngbǎnga tó awáwù-ònzǐ ale. <sup>25</sup> Ndi Kàgàwà, yà atdíró tí arí'í àlě tó Ɔgùba tí, Yěsù Krístò, àlě tó Ádrùngbǎle-otù ǒ ale, náká ifuta nà, ádrùngbǎnga nà, ɔbi nà, ndirò dhu ỳyǎ ka kí ìndrú tò nǐ ɔbi nà, ròpè ndì mǎhàngú ò rò, rìrà àhù kòmbí nga ò mǎtí, ndirò dhòdhódhóngà nà! Àmìnà.

## **Ungbòta-Ɔwátá Tó Bhǔkù**

### **Ndrǔna: Ungbòta-Ɔwátá Tó Bhǔkù New Testament**

copyright © 2015 Wycliffe Bible Translators, Inc.

Language: Ndrǔna (Ngit)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 22 Feb 2024 from source files dated 29 Jan 2022

abb6c630-aaf1-5647-8172-605215e8fe12